

今白華堂文集

山東臬司六事議

申程鶴樵由承

竊本司蒞任後體察東省積弊情形必須大加振作方能漸次挽回茲謹就管見所及將本司應辦之刑名事件酌擬章程約計嚴緝捕三條釐訟獄三條分別開具清摺呈鑒儻可採擇伏乞奏定施行

嚴緝捕

一東省盜賊橫行半由地方官諱盜不肯據實懲辦所致本司前因補授江西臬司馳詣熱河行在謝

恩請

訓仰蒙

聖諭諄諄務以戒飭屬員屏除諱盜惡習爲要本司跪聆  
之下字字敬銘五內旋蒙

簡調東省到任後接見各屬必先仰體

聖慈委曲開導以我

皇上振飭吏治亟望除莠安良凡緝捕認真之員皆蒙逾  
格

恩施宥其處分從優甄擢乃地方官不知奮勉諱盜爲竊  
習慣成風近來惟東省爲尤甚每遇民間報盜前赴勘驗  
輒云不似強劫情形差役等迎合本官逼令改認是竊非

強並藉此勒索酒食盤費叫囂隨突滋擾百端較盜賊更爲兇惡事主不堪其苦只得曲意從順該匪徒揣知官員諱盜皆謂偷竊易遭擒治不若行強轉獲包容因而明火執仗肆無忌憚盜風日熾職此之由在若輩欲避處分始終掩人耳目必不肯令上司知之養癰貽患誤盡地方一至於爲上司所知辦理卽形棘手伊亦躬罹刑辟是欲避處分者適重處分昏愚繆戾何至於此此種情弊悉在聖明洞鑒之中仰蒙

如天之仁憫其愚昧不忍不教而誅是以

飭令本司苦口告誡各宜痛改積習毋致自蹈法網如此

丁甯反復尙恐有不肖州縣從昧卽聾罔知悛改應請奏明嗣後遇以盜作竊之案如果查係有心諱飾者該州縣罪名隨案酌核照例加重定擬庶足以昭炯戒

一查竊盜情罪輕重懸殊他省民風較懦雖穿窬之徒亦甯爲巧取不爲豪奪故有贓數甚多而不得謂之盜者惟東省案件則不然計其贓物每止如小竊之數且起意本屬行竊一被事主驚覺輒臨時嚇禁行強蓋他省竊與盜異東省竊與盜同風氣使然猝難變革此盜案之多所以倍甚於竊案也地方官紛紛承緝慮干處分或擇其情節本輕者妄思遷就亦或毫無顧忌雖顯然巨盜竟欲改作

竊情究其弊端良有所自查定例盜案四參限滿應降調者有級雖准抵銷但州縣所有不過一二級東省每州縣年中報盜必不止一二案級不敷抵人人皆可降調近年上司衙門因礙難悉數參辦且恐廉能素著之員亦皆將被累而去於報案介乎竊盜之間者不無酌量從寬致不肖劣員引爲口實有恃無恐竊思除弊務絕其源參辦一人必令無可援解方足以服衆志上司於盜案之輕重官員之賢否既有確據與其暗中區別何如明示章程向例未入流降調無級可降其平日居官尙好者仍准留任細繹例意未入流俱係無級可降之員革不勝革是以量爲

變通今東省州縣多係盜案失察應行降調之員降不騰降亦宜稍爲參酌但未便因此改例致他省從而效尤可否奏請嗣後東省盜案除實係明火執仗劈門入室地方官仍予降調處分外其先竊後強祇係臨時嚇禁護賊拒捕之類四參後應降一級調用之州縣如果官聲素好由上司隨案核明籲懇

特恩改爲降二級留任俾知好官得從破格自無庸稍存瞻顧而不肖劣員有始終執迷仍蹈諱飾惡習者從此歷可數亦自不難逐一嚴懲於整飭捕務之方益爲切實一東省盜匪往往藏於地窖之中前經陳中丞奏明平賊

有案又竊賊三人以上執持繩鞭器械者亦經奏定發極邊煙瘴充軍查地窖所以存貯果菜本不在例禁之內民家多有勢不能逐戶查悉恐徒有平毀之名轉致差役藉端訛詐於民不便莫若隨案核辦凡賭博姦拐窩藏盜竊容納邪匪等案在地窖內被獲者各就本罪上加一等卽將地窖平毀辦法較爲認真至執持器械若刀槍鐵尺繩鞭等項係專致傷人之物情形固爲兇惡乃近來竊賊多有無心攜帶小刀及剃頭刀裁紙刀並挖空鐵鑿防犬木棒之類因新例內未經分晰俱作爲執持器械並將同夥不知情之人概發煙瘴未免情輕法重應隨案核明分別



辦理此兩條係近年新設章程小民多未知悉經此次酌定後大張曉諭方令人人知所警覺但此猶非弭盜之至要者若捕役叅盜營兵庇盜幾於通國皆知此輩或坐地分贓或得受月規本官比緝稍嚴則拏一二小竊充數而於積匪巨盜暗通消息縱令潛逃甚至有著名大窩爲捕役營兵所不敢過問皆其平日玩縱積漸使然本司於充沂道任內察訪有素見在嚴檄各屬搜除賊窩並查盜案較多之處提捕嚴比惟所以制馭捕役者殊鮮良策尙在博採周諮嗣後或將叅盜之捕役較窩主加等治罪其云丁通盜卽行正法梟示如此從嚴懲辦亦庶幾弭盜之六

端也以上各事宜亦請詳晰奏明並分別咨部立案以便  
遵守

釐訟獄

一設官分職各有攸司一省之事分隸於各府承上起下  
全以知府爲關鍵近來東省官常案越州縣事件應由各  
府核定者上司輒行徑提以致省中諸務冗積案牘混淆  
因循疲玩之知府以責成不專轉得藉以藏拙此吏治所  
以日弛也卽如上控案件或未經控府或府審未結一經  
提省各該府自皆置之度外其初蓋因知府怠於辦案以  
爲不得不提殊不知省城於各屬見聞旣遠案情虛實難

分牽砌人證動輒數十名勢須紛紛提質原告於人證未到時疊次呈催及將次到齊慮審虛坐誣遂百計設法脫逃始則因其原告案未審定旣不能收禁又不能嚴押迨至逃脫無從定案被累者遂靡所底止又或故將見無下落之人列入辭內卽使別款審虛而此款無人質證不能明坐其誣終致案懸莫結計省中院司各衙門批發首府舊案新案常至三五百起在院司固理繁治劇之不勝在首府亦舍已芸人之不暇紛紜擁擠日積日多卽使案皆平反計每案超雪人數不及無辜被累者十分之一甚至久羈囹圄瘵斃纍纍是提省本欲雪冤而適以滋冤況訟

棍刁徒因此蟻聚省城勾通書役壞法亂紀風氣豈復可  
問竊思各該府就近辦案察訪易周應提者提應釋者釋  
往返亦較速便諸弊可就肅清如果知府無聽斷之才蹈  
因循之習亦應據實糾劾斷不容爲之代庖應請嗣後上  
控案件未經該府審結者除案內牽涉府署丁胥仍應提  
省審辦外其餘俱遞交各該府分別親提飭屬勒限審詳  
卽京控案件非奏奉

諭旨交省審辦及實係命盜重情亦應由各該府審明詳  
核省中核有疑竇再行摘提覆鞫以免延累而專責成儻  
該府承審遲延卽照例參處其有勘斷不公及草率錯謬

視案情大小分別奏參降調革職臨清濟甯兩直隸州亦照此例俾其知儆畏不敢怠忽從事庶訟獄得以漸就清釐

一臬司衙門批發各該州縣審辦之案經本司查明前任內未結者八百餘起卽開單嚴札行催並飭令將已未審結起數按月造報以憑稽查勤惰乃各州縣徂於積習兩月以來詳報結案者甚屬寥寥疲玩已極查前司積存各案一千餘起內由司招解之案一百六十餘起早經本司趕辦完竣而批發各屬之八百餘起依然充積上年和中丞奏奉

諭旨嗣後州縣官任內延不審結至一百案及四十案以上者革職發往軍臺其四十案以下者奏請革職等因欽此定例已極嚴明各州縣尙敢漫不經心泄泄如故見查積壓四十餘案以下或三十餘案或二十餘案者其有數十州縣伊等固因積重難返妄意罰不及衆相率效尤亦由該管知府直隸州並不稽查督率所致茲本司復將州縣積案起數分晰彙開每府每直隸州各爲一冊飭交該府州按起督辦應親提者親提應勒催者勒催設立循環號簿開明管收除在按月送司彙核在案但恐因循怠玩者或仍視爲具文應請奏明定限先於一月內將舊案詳

結十分之五如有違逾該州縣概行摘去頂帶本管府州  
降一級畱任嗣後新舊案并計按月比校下月起數總須  
減上月十分之三若有增無減或所減不及分數該州縣  
降一級撤回府州降一級其有積壓本多始終疲玩三月  
內毫無起色者州縣革職府州降調所有撫署及藩司批  
發之案均歸一律辦理庶其知儆戒可期力挽頽風

一東省風俗雖壞其實良民千百莠民不過一二地方官  
甚畏莠民因而不愛良民於辦案可概見焉查向來放告  
有期狀詞有式恃老恃婦及誣告越訴者有禁推原其故  
蓋以濫杜刁風非以抑勒善類也立法本自平易良民無

不願遵惟莠民則以爲不便於已必破壞條例以肆其譁  
張之術批呈稍不如意狀榜一出卽圖頂控則不候告期  
矣呈詞荒唐違悖恐官代書不敢謄寫用戳則不依狀式  
矣年老婦女莫敢誰何得以放賴撒潑則不用抱告矣或  
懷挾嫌疑或希圖訛詐憑空捏證不得不傳則計在誣控  
矣控情本虛圖准不圖審州縣奉批差傳匿不投案逾時  
上控可指爲書差延案則利在越訴矣凡此皆良民所斷  
不肯爲亦斷不能爲而莠民爲之以拖累良民者也訟庭  
之上相率匍匐凍餒顛顛呼號求脫者孰非良民地方官  
稍有人心豈能不惻然動念乃因循畏葸罔知振作更有



忍心害理之巧宦以陰附莠民爲合時宜者彼知良民性情樸愿隱忍受害無人得知莠民則上控京控詭計百出聲氣暗通浮言易播一繩以法未必不被其傾危莫若曲遂其意使之散布浮言以爲某官尙肯辦事尙能審案其實莠民所稱頌之能員皆良民所隱恨之巧宦也是非倒置獄訟日滋竊惟欲挽刁風莫若恪遵定例本司莅任以來凡所控非實在緊急命盜重情必令於三八放告日遵式另呈老幼婦女不許無抱告誣控者反坐斷不將就完結越訴者遞回應審衙門收審業俱出示詳晰曉諭在案第積玩之後蔑視成法往往有意抗違可否申嚴例禁奏

明請

旨飭遵俾秀民不敢生心搖奪地方官亦得認真辦理無從邀譽取巧庶良民多所保全再近日有攔輿臥地將白呈撩入輿內拚命圖賴者有潛身闖入內署騷地狂叫者有衆證確鑿原告仍不具結認誣以致案懸莫定者有辭窮理屈情願畫供故畫一天字以示挾制者流極至此法紀蕩然不能不嚴加懲治見在本司隨案詳請奏辦合并聲明

程中丞敘此議入奏奉 旨交軍機大臣會同刑部議覆旋據覆奏云州縣緝盜處分若分別改爲降罰恐多

彌縫遷就應毋庸議至竊盜三人以上執持器械發極  
邊煙瘴充軍係照回民之例並不以攜帶之有心無心  
區分科斷所議分別核辦之處應毋庸議餘均應如所  
議辦理奉 旨依議

## 治河疏

臣聞河出崑崙墟色白所渠并千七百一川色黃百里一小曲千里一曲一直其所并者衆又皆挾沙以行故勢大而力猛隨性所向曲直自由不能悉循常軌禹之治河曰導曰疏而已若不務疏導而務隄防則不足以殺其勢而適足以激其怒周語曰川壅而潰其傷必多壅於此必潰於彼鯀堙洪水與白圭之以鄰國爲壑乃古今炯戒也漢代宣防下竹櫂以塞瓠子蓋塞於已決之後非防於未潰之前後世仿而行之或略加變通審其勢之小曲者塞焚槌石預爲備禦以防之不峻故不至爲患而時足以弭小

患於目前今之築壩隔埽是已然南岸取直則北岸坐灣彼此相因工段層出籌防稍一失當更復引漕生工歲修搶修所需不貲今部臣核計東南兩河工用自嘉慶元年至十年已及二千餘萬浩費如此則國帑安得而不絀哉曰今之河工繫乎漕運非可與古昔比前河臣靳輔相度南河形勢匯清水於洪澤湖建束清禦黃二壩於清黃交匯之所蓄清以敵黃刷黃以濟運法甚善也近歲大河日高由湖口倒灌入湖重運渡黃旣難逆溯而上而湖水不出南運諸河尤有斷流之虞至不得已議開禦黃壩轉爲引黃入運之計以暫濟漕艘久之沙淤運河終恐誤漕國

家大計所關猶安能不致力於河務哉雖然如其說則糜帑以治河莫如近歲而河患之甚亦莫如近歲不急思改圖而徒以修防爲致力未見其有濟也夫修防之術固僅足以弭小患耳至若河勢之千里曲直或數百十年而一變自古無能禦者禹疏九河以來故道屢更故賈讓有徙河之議今河勢旣不能下趨似當用其策矣然臣又以爲不可何則古昔地廣人稀故得棄曠壤以予水今濱河皆繁劇州郡民居稠密一旦舉其室廬墳墓而遷之勢必騷然不甯其不可者一也河徙必有定向俟其旣定乃可導之使遷今河勢未定聽其所之必至泛濫四出其不可者

二也河之舊槽雖以沙淤就高然沙性流滯不常未必遂如平地今徒就無槽之平地卽勢處卑下一遇沙停恐轉高於舊槽其不可者三也然則當用何法以治孟子曰水由地中行地中者河之底也禹貢諸水皆曰入於海海口者河底之極也近世治河書有曰束水攻沙束水攻沙者治河底之要術也今雲梯關外海口淤積日久河工官員名之曰鐵板沙皆以爲無復疏通之理不肯致力遂令所淤之地日益就近自外而內計可百數十里矣由此推之則河底之勢亦必愈下愈高若坦坡然下游爲坡頂上游反爲坡足其蓄怒橫溢灌入洪澤湖也固宜臣以爲今日

之急務在通海口欲通海口在濬下游欲濬下游在測量河底知其受淤之漸始於何處而因以施束水攻沙之法其法自海口築隄迤上至於始受淤之處河底愈高則兩隄相去愈窄逼令搜淘嫩淤以漸而深所蓄之力益勁以肆雖及鐵板沙亦必能穿齧其根潰突出得勢之後百數十里可一刷而盡上游乘勢直下爭赴尾閭則全河治而諸患皆免矣願臣方以防川爲炯戒而又以束水攻沙爲計者何也海口與內地異雲梯關以外無居人焉其內所謂若坦坡者度不過數里而止兩岸民舍亦甚寥寥設攻之而潰不難卽時遷避而河卽奔騰橫溢必歸於海蓋



與海爲鄰則雖以鄰爲壑而實以海爲壑且因刷河底而束之亦異乎遏河勢而防之也夫誠能以防全河之心專注海口復以刷河底之法施及全河則上游下游皆因勢利導猶奚事多爲防禦哉臣謹疏

請崇教化以靖人心摺

陝西道監察御史臣童槐跪奏爲敬陳管見事竊維今日之急務首在靖人心欲靖人心務崇教化我

皇上宵旰焦勞勤求上理炳諸

宸章以覺世牖民者至諄至切而牧民之吏不克宣化承流仰稱

睿旨伏讀

御製行實政論有曰忠孝廉節斥爲腐談此實今之大弊惟

聖明洞鑒本原在乎變化之媿勵之以開其錮蔽者也夫

邪教之患自古而有上世九黎亂德神人雜擾雖黃虞郅  
治未嘗不間伏沴戾漢唐以來炷香斗米沿流不絕譬猶  
陰陽寒暑之中人無時不可以致疾疢元氣足則疾疢不  
生卽有疾而藥之亦未有不顧其本元者林清逆豎子耳  
其狂易悖亂本無賴小人之尤三五黨徒戾氣所鍾並爲  
梟獍此外知情從逆之犯逮案推問茫如醉夢必謂其狡  
惡性成恐亦未然而賊渠等初無煦沫之小惠又無吞噬  
之兇威其藉以簧鼓乃明季閹豎所造作荒唐謬悠中人  
以下所聞而怪笑之俚詞竟一唱百和任其毆至死地而  
冥然罔覺者何也昏氣之積由來已久人心不能無所趨

向正教失而後邪教肆故曰經正則庶民興下無學則賊  
民興向使親民之官實心化導上下聯屬俾鄉曲蚩氓不  
至散而無紀雖有賊民如林清亦奚從而煽誘哉記曰君  
子如欲化民成俗其必由學乎閔馬父譏原氏不說學曰  
不害而不學則苟而可吏治之壞於苟且皆自不學來也  
今與官吏言正心修身必以爲迂闊而竊笑之州縣官謁  
選以後赴任以前所羣相聚論者非缺分之肥瘠卽虧賠  
之多寡非探上司之性情以圖迎合卽習官場之酬應以  
結聲援求其畱心案牘者什不得一更求其盡心撫字者  
百不得一官之在任若傳舍民之視官若贅瘤官與民各

不相爲猶父兄不與家事則子弟中有一二桀黠者得以誘衆子弟於不善猶且視爲固然覩顏人上懼罪則養癰貽患邀功則遇事生風彼其心先不靖尙何能務教化以靖民心

國家章程明密品式周備如宣讀

聖諭廣訓及編查保甲舉行鄉飲諸事成憲具在詔諭屢申顧從未見有實力奉行者自古有治人無治法故爲政在於得人卽如近日紛紛以保甲爲言誠周官相糾相受之良法然成周比閭族黨讀灋興賢無時非教是以其民知尊君親上而奸邪不生今若徒事編查不加教

誨則如前日宋家莊黃村董村固安羊修店之民比戶習  
邪以邪教保邪教有互相容隱已耳人才固不易得知人  
尤非易事近奉

明詔飭令各直省廣行甄別伏思澄汰庶職實吏治轉移  
之機儻此時而仍目爲具文祇効年老數人以充數又奚  
當焉臣竊以爲學術久墮流品日淆總不出孟子所稱懷  
利事君之一語大吏宜力矯風氣詳加察覈凡猥鄙營私  
逢迎見長巧捷華辯麤暴酷虐於吏治無益有損之人悉  
列狀効去之必其性行醇實深知大體或立志較然略見  
節概者方可畱治而又時時激勵造就喻以

卷之三  
朝廷更化善俗側席賢才無取俗吏爾等爲民父母四境之內卽爾一家果學道愛人雖不必家至戶說隨時隨地設法化誨自有成效如此明白開示使知意嚮所在所謂上有好者下必有甚焉者矣成效旣彰則當破格保舉俾羣吏相觀而善我

皇上登崇俊良於外官公罪處分之有礙遷調者已敕所部改例從寬苟忠信之長慈惠之師教成而民興行上司猶何所避礙而不登之薦牘抑大臣以人事君進賢受上賞蔽賢蒙顯罰古之制也似應申議專條以教化之興替黜陟之當否定爲督撫考成於鼓勵之方更爲切

至焉雖然教與養相資而養必先於教近日官窮民困輒云救死不贍奚暇治禮義哉夫果得其人如傅鼐之治苗疆李毓昌之不肯冒賑興利除弊總在人爲何至動形窒礙惟是盤錯可以試賢哲而寬裕所以處中材各省情形隔闕非一或阻於事勢不暇教養陽奉陰違恐自好者猶所不免與其支吾掩飾以長頹弊之風何如決壅導滯以廓清明之象微臣不揣愚昧懇請

敕下各省督撫詳詢所屬如有各項疲累難爲循吏之隱情准其據實剖白代爲上聞請

旨定奪



聖心執兩用中稍可變通必予調劑至如繁文縟節名爲吏事徒滋濁亂或陋習相沿本干例禁者督撫得以自主卽一切斥罷之此後綽乎有餘措施更便若仍無善績是必其不能教養者也否則其怠惰委靡不肯教養者也又不然則其錮於習染視教養爲迂圖者也如此之人概宜論罪大吏不奏論者罰如律庶遠近上下咸曉然於教訓正俗垂意至隆雷厲風行日月清照莫不振奮志氣勉爲循良吏治民風蒸蒸日上夫九月十五之事固從來所未有然揆諸物理不過如飛蟲溼生忽集於太陽之下於盛治之光明溘耀萬萬不能上累纖毫卽滑縣殘孽迅就掃

除自堪仰紓

聖塵若獲犯所供則或由豫省賊徒畏懼官兵故散謠言以爲緩兵之計事關重大誠不可遽信其無要以戒備之嚴雖無事當如有事鎮定之力雖有事當如無事人心易動而難靜亦在各處查辦不動聲色毋爲煩擾而已惟夫敦崇教化爲治之原無論白陽紅陽一炷香獻供會以及天主教順刀添弟各教匪會匪皆可潛移默率弭患未形況犯上者作亂之由近歲蔑倫重案幾無虛日誠使曠然一變其俗未有不好犯上而好作亂者故崇教化以靖人心乃似緩實急之務不可不汲汲也至於除莠安良濟

寬以猛近來奸宄顯而易見者莫如攬訟刁告之徒其把持鄉閭鉗制官府險健之性可以無所不爲地方官豈能竟無過失慮一被訐控不免解任受累稍形畏顧此輩愈張恃其聲勢相率罔上林清牛亮臣曹綸諸逆卽因串謀辭訟狼狽爲奸而起者也夫摘發巨奸已在事後懲儆頑慝當在事前今地方官失察匪徒處分旣邀

恩改爲寬典有司緝訪所及自必立時舉報而此輩積玩之後狡詐百出或捕風捉影先發制人又編造歌謠投遞匿名揭帖乃近來宵小慣技若非明立制禁恐譁張爲幻迄無已時州縣救敗不遑終未能專心教化伏乞申降

論旨嚴禁刁風凡事不干已痛非切膚藉端訐告官長及以歌謠揭帖相傾陷者不論虛實先重治本人以應得罪名則刁徒挺身而出欲售奸欺適蹈法網較之平時訪拏尤易爲力而職在守土者鋤豪強扶善類更得從容治理不至輕爲搖奪且上下之分嚴而綱紀肅亦靖人心之一端也微臣一介慙愚感荷

聖恩擢居言路思欲殫竭鄙悃踰分冒瀆無任屏營伏祈  
皇上睿鑒謹奏

陳奏查拏逆犯章程摺

陝西道監察御史臣童槐跪奏爲敬陳管見事竊以逆案各犯罪大惡極當悉數搜殄不容稍任稽誅以致遠颺漏網前者首逆林清到案所供八卦教首李文成馮克善崔士俊宋躍澼等今或已就戮或尙在逃皆實有其人則所稱趙得一王道澼于克進楊遇三等姓名亦必確鑿又據供聞禁城時每一執旗賊目領賊十人或十一二人計總賊目陳爽等及散賊目十一人所領夥匪約百數十人質之續獲各犯供皆脗合其同一賊目所領彼此互供無一舛異者時臣以軍機章京會同刑部司員研鞠各犯飭將

供招之同夥數目姓名年貌住址列單存案又繕雨單分送步軍統領順天府飭緝嗣各該衙門按單獲送者皆一訊而服毫無疑義除審辦外尙餘魏榮禮魏大賓劉進亭三股首夥多未就獲覆訊各犯僉云不知其生死蓋九月十五六日所殲斃匪犯未經活賊證明或魏榮禮等卽在此內亦未可知然昨日獲犯田起錄乃其子田馬兒所稱不知生死者可見單開各名尙多未經殲斃之犯在逃旣久當已遠竄而近日各處所囚解年貫姓名無與部中存單符合者往往愚癡乞丐形迹可疑地方官稍加刑嚇卽混供誣服甚或奸民挾詐傾陷及不肖員弁妄拏微功到

部覆訊輒成子虛每案輾轉拘質未免拖累無辜我

皇上宵旰焦勞又豈堪以捕風捉影之事上煩

聖心况憑空查辦則心思不定耳目混淆或致真賊乘間  
免脫所關匪細竊思賊犯之真偽雖難盡悉然必先就其  
確鑿無疑者注意緝獲方爲正辦未便舍其實而轉求諸  
虛伏乞

敕下刑部頒發逸犯詳細清單令各省按單緝捕務在必  
獲其有姓名近似而年貌籍貫迥殊初訊卽當訊明疑竇  
或并非單內姓名祇以迹涉疑似盤獲者尤當詳究確據  
毋得草率定供送部冒濫如因仍前弊經部審有貪功誣

陷等情按律治罪庶咸知從實查辦不至以僞亂真再前據都統臣高杞奏起獲逆犯徐安輜等姓名簿據四本宜並

飭令送部刊頒各省俾獲犯時憑以查對如此則各地方既無案外之擾而真賊亦必不能日久潛伏逆黨自可淨盡矣微臣愚昧之見是否有當伏祈

皇上睿鑒訓示謹奏



河南滑縣軍務告竣條陳善後事宜摺

陝西道監察御史臣童槐跪奏爲敬陳管見仰祈

聖鑒事竊本月十二日豫省軍營奏報克復滑城殲除餘孽昨復奏報軍務全竣此皆仰賴我

皇上天威洪福得以迅蕲膚公從茲衽席咸登昇平永享中外臣民曷勝欽感抃頌之至伏思此時緊要惟在善後事宜

睿思經畫洞燭幾先非蠡測管闕所能議擬萬一微臣不揣愚陋竊冀稍抒鄙悃約舉五條敬爲我

皇上陳之一關津要隘宜倍加防範也此次近賊各省屢

奉

諭旨申嚴戒備無使賊匪一名闖入俾軍營圍剿得以聚而殲旃辦理實爲盡善茲各處一聞捷報自皆安常處順漸弛戒嚴查首逆林清到案時曾據供自直隸大名至東省之曹濟豫省之濬滑及山陝之太原歸化城等處俱有同教匪黨聲息相通又獲犯供稱往來屯聚多在河西務臨清冀州各地方計官兵圍滑時賊匪自不能肆竄勾結城破後難必無逃出餘匪假充難民向各處潛勾黨類與其就地紛紛海捕不若沿途節節嚴防應請旨敕下各省文武大臣飭令員弁兵役於關津要隘處所

加意堵守毋得以軍務告竣稍有懈弛庶令道路肅清奸匪無從潤迹一投出難民宜急籌安輯也查東豫兩省先後投出被脅難民不下四五萬人該地方連年荒歉本有流亡事定後四處招集者爲數更多兵燹之餘田廬盡毀必須妥爲撫卹惟是籌畫經費甚屬不貲而殲獲匪徒所遺逆產及被難人亡懸產無著者當亦不少自可以無主之產安插無業之民應請

敕下各該督撫轉飭地方州縣卽將此等產業通查實數造冊報部毋任豪強吏胥稍有侵匿一面編核難民數目分別極次籌定安插章程俾窮黎早就輯甯地方益臻敕

謚一官兵凱撤宜申嚴約束也查此次各路帶兵大員俱能遵奉

諭旨認真彈壓兵行尙稱安靖第恐既經奏績管約稍疏所過地方難必無高興多事之處并恐不肖官役藉端勒索輾轉騷擾或致激成事端請

敕下帶兵大員等於凱撤之時申明紀律按程行走務令隊伍整齊毋許稍涉驕縱並

諭令該地方大吏畱意伺察有無兵弁官役沿途擾累情事隨時奏聞或密派明幹大員分往嚴查稍有前項情形卽行參辦益足以杜縱恣徇隱等弊一軍需報銷宜嚴杜

冒濫也查戶律條例內載地方有軍需公務督撫不及咨題者行令該州縣墊辦事完十日內卽照實價申詳該督撫照時價核實於文到半月內題報戶部儻州縣申報過限或督撫題報後期俱交吏部議處等語所以杜冒銷侵欺之弊者定例綦嚴前此川楚各省辦理軍需多未能按照此例以致輻輳朦混弊竇叢生此次直隸及東豫二省雖迅速歲功所費恐已不少應請

敕下戶部先行知各該省務須按例查辦除業經題報在案外其未經題報者准其以奉到部文之日起限如期補報儻再有違逾卽照例參處似此辦理庶可以杜延混而

絕侵漁一劣衿從匪宜倍示創懲也查各省軍營節次奏報內指出賊目竟有舉人生員及曾受助教職銜者較之愚民從賊尤可痛恨並風聞有見任教官甘汙偽職居然聽賊指使如果傳聞屬實是該教官喪心昧良狗彘不若其所管生監等相率從逆自所必有見在搜除殘孽不容一人漏網恐此輩恃衿巧飾轉得倖免刑誅當此安集善良振新教化之際伊等冒爲四民之首非煽誘閭閻卽敗壞風俗不可不淨絕根株應請

敕下軍營大臣等按冊詳查悉數嚴辦並將失察之該學政照例查參尤所以挽回士習培養民風也以上五條似

善後事宜中所不可少臣愚昧之見是否有當伏祈

皇上睿鑒謹奏

酌擬整飭章程摺

代錢潤齋中丞

奏爲酌擬整飭章程仰祈

聖鑒事竊臣承准軍機大臣字寄奉

上諭據錢臻奏報接印任事日期一摺山東吏治廢弛民情刁健近年以來積弊已深急須大加整頓力挽頽風朕聞東省官場不以公務爲重專以賭博飲宴爲事因循玩愒不畏上官其民風之刁健甚至有當堂鞠訊之時輒敢挺身起立聲言此處不能審理另赴他處控告者地方官畏其兇橫不能拏究因而相率效尤京控上控案益增多錢臻任事後惟當於此二事加意振作等因欽此仰見我



皇上至聖至明洞燭東省情弊臣才微任鉅荷蒙

訓諭周悉得所遵循惟有益加奮勉伏查東省官不愛民  
民不畏官臣在江西時卽聞有此積習莅任後詳加體察  
乃知民不畏官官轉畏民倒置之勢人人皆以爲難非遂  
巡退縮卽委曲調停其於刁徒訟棍視爲鬼蜮惟恐爲其  
所中猶何敢除莠安良此非特不愛民而已畏民之弊更  
甚於不愛民也究其所以致弊者十數年以來情形屢變  
愈變愈壞其始沽名釣譽者罔顧大體舉向來不能不借  
用民力之事一切裁免遇牽告錢漕無論鉅細輒參革治  
罪往往連劾多員以爲不如是不足以博愛民之譽殊不知

知民可使由不可使知刁徒揣知意嚮於所惡州縣皆得  
毛舉細故以去之則不畏官矣然當時之弊祇在於民不  
畏官若加意鎮撫猶不難整治也旣而上司溺於私慾屬  
員巧於逢迎聲色貨利無所不至省中公事但付之幕友  
吏胥仍令與各府州縣互相鉤結侵冒影射以致百弊叢  
生元氣大耗則不愛民爲已甚以素不畏官之民遇甚不  
愛民之官挾制有藉固將日肆無忌矣然果能探其源本  
次第清理猶不致弊益加弊也近歲承積疲之後未嘗不  
加挽回無如百孔千瘡猝難補救卽如上年御史俞肯堂  
奏摺內所稱有奏咨控案之繁期有倉庫新舊之虧額有

緝捕盜賊之參限有稽核賑卹之嚴條有防河濬運之急  
務有催兌督漕之要需張皇補苴日不暇給又所稱案證  
不齊有民匿之盜賊遠颺有民縱之奏銷而民役累欠官  
爲被議詳案而隨詳翻控官爲掣肘以及蠹役與家丁聯  
結必有民利其聲勢土棍與劣衿把持必有民私爲牽引  
種種棘手皆係實在情形上司欲正本清源動多格於例  
案礙於事勢未免卻顧躊躇其或一味操切徒以參劾爲  
風厲則去其官不足以服其心相率觀望委之於命何從  
望其振作且官情愈怯民氣愈驕此所以成倒置之勢也  
州縣之在東省者材質當不異於他省卽賭博宴會係從

前惡習近歲亦已漸少其因循疲玩似亦不盡在此此時  
欲整飭吏治民風臣愚昧之見似莫若先辨上下定民志  
使百姓不敢犯上州縣不至畏首畏尾庶幾有可爲之勢  
而又裁汰靡費予州縣以能爲之力芟煩就簡予州縣以  
得爲之暇方可期日有起色臣與兩司悉心酌擬似應稍  
破常格凡州縣正雜攤捐等項必須量其出入或有因公  
賠累較甚者隨時調劑杜其侵虧並須明示款目毋任幕  
友吏胥從中弊混滋累此予以能爲之力也無事不准上  
省卽因交代因案件來省者飭令趕辦速結速回其差查  
委提札調等事苟非萬不得已毋令四出紛擾滋累此予

以得爲之暇也至訟棍挾制官長拖累良民動輒上控京  
控經前撫臣程國仁奏定分別發交各該府審理臣見又  
飭令各屬將原告避匿者卽就所到被證訊明虛實擬結  
如將來原告到案不准再翻專治其脫逃之罪其不遵呈  
式恃老恃婦攔輿撒賴及呈內毀罵官長臨審當堂起立  
藐抗無狀者先行責懲再行審訊一面示諭良民一面密  
拏訟棍地方官從此當有可爲之勢惟訟棍詭計多端知  
查拏緊急必勾引原告進京卽如前次一將控案奏交各  
府恐被遞回多有脫逃赴京翻控者近日京控之案較多  
是其明驗臣已將日內查明脫逃之原告咨會都察院步

軍統領順天府五城如該原告驀越呈訴卽遞解回東以  
憑審究並擬咨請嗣後東省民人京控訊係戶婚田土錢  
債口角細故及雖係重案在本省控告不久未經投案質  
訊者斟酌駁斥毋庸奏咨則民人等知京控不能有准無  
駁不肯輕費盤纏訟棍之設局盤踞者生計漸少日久亦  
必散局較查拏更易爲力如此立定章程然後地方官綽  
有可爲其有怠玩性成仍不以公事爲重致百姓冤抑控  
訴者是眞不知愛民之劣員臣必當據實嚴參令其無所  
藉口自可懲一儆百至省西曹州一帶習染邪教經臣密  
派妥幹員弁改裝前往訪察尙屬安靜以後惟當刻刻嚴

防密緝不敢稍懈惟差遣稽查以得人爲最要卽省中及各府州事浮於人亦患人才稀少臣尙在留心察看如果應請揀發容續行奏請總之東省爲近京要區疲敝已極臣受

恩深重知其難不敢畏難惟期審以定識持以定力勿拘牽以誤事機勿鹵莽以求速效務期積弊漸除風會日轉稍副我

皇上諄諄誥誡至意所有臣恪遵

聖訓酌擬整飭緣由理合繕摺密奏是否有當伏乞

皇上睿鑒訓示施行謹奏

請設局審案摺

代錢潤齋中丞

奏爲節次欽奉

諭旨恪遵辦理並附抒管見奏祈

聖鑒事竊臣到任後卽蒙

特旨飭諭凡東省京控之案或奏或咨俟審明實係虛誣卽將原告加重治罪等因欽此嗣於五月十四及二十五二十九等日疊奉廷寄

諭旨云云仰見我

皇上至聖至明洞徹東省訟弊凡所以正本清源者指示周詳無微不至臣跪誦之下曷勝欽感伏查東省京控各



案無不架捏大題審係虛誣者十居七八數年來地方官畏首畏尾往往以姑念所控尙屬有因並到案卽行供明與始終誣執者有間等詞曲爲輕減以致刁徒益無忌憚茲臣遵

旨通飭各屬將虛誣者加重治罪毋許仍前姑息至訟棍情同鬼蜮雖素係著名未易得其實據一有舉動輒先被反噬茲臣遵

旨訪拏與臬司童槐查得向來著名及曾經犯案者已有數十人先行訪拏一面出示招告俟審明自當加重治罪其原告脫逃兩月不到案者亦已遵

參卽原告解回就質何肯再服審訊稍不遂志甫結卽翻勢不至奏請欽差不止而使車一出又必疊加奏案以圖併交欽差見如辛邁遷之子辛濬川訊係早經赴都乃伏而不發俟欽差侍郎那彥質等有赴東之信卽行遞呈又如本年春間遵照奏定章程將尋常京控咨案發回各府審辦刁徒不肯發回者乘欽差侍郎廉善帥承瀛尙在曹州遂紛紛赴京翻控是呈詞之輕重遞呈之遲早皆若輩主持其間以爲操切地方大吏之要訣臣下車伊始幸值京控稍稀此亦適逢其會在臣實萬萬不敢自信且設使所控實係被屈良民是其意祇在申冤理枉誠如

聖諭秉公審辦數案則遠近傳誦遇有屈抑自必赴本省  
控理乃查歷次審明京控之案大率皆誣捏逞刁惟恐本  
省秉公審辦不能取勝是以藉京控爲挾制見如京控謀  
賣伊女之原告濮州民劉子卓於本月十四日遞解至省  
城西關外乘解役赴鋪買煙卽潛逃無蹤伊如果有屈抑  
何以不敢進省以上情形以所聞合所見實皆一一相符  
臣並不敢預存成見稍有偏聽積弊至此欲息京控之風  
實屬不易因念歷任前撫臣等未嘗不深知此弊祇因不  
敢明言以致頽風日甚臣於此時若再稍存瞻顧勢必至  
獲咎辜

恩左右思維與其箝口結舌聽操切於衆人何如瀝胆披  
誠求照察於

君父況臣悉心體察東省爲天下要衝關係至重一切根  
本要圖如倉庫城池等項在在均須整理而省西曹州沂  
州一帶邪教匪類實繁有徒其地與直隸之東明長垣河  
南之開歸南汝江南之豐沛蕭碭四處連接情勢尤爲可  
虞是闔省全局責成巡撫者視審理辭訟一端鉅細已屬  
懸絕而捕風捉影如刁徒京控各案並非正經辭訟更不  
容爲其所誤矣乃自臣蒞任至今甫及兩月接收京控奏  
咨各案已有數十起之多此都察院奏稱京控日漸稀少

之時尙且如此若屆繁多更不知何似竊思欽差大臣係專審案件之員除行路日期不計外大約審結一案遲則月餘至速亦必須旬日以此比擬見在接收京控各案須較欽差辦理迅速十倍方免積壓無論人力所斷不能即使能之而本省上控案件已不及兼顧於地方應辦各要事更無得爲之暇以無情之獄辭耗有用之時日牽掣因循貽誤何底近來東省元氣之虧未始不由於此此臣所輾轉籌畫體察東省難治實在情形不敢不直陳于聖主之前者也臣前奏內擬欲咨商在京衙門凡控非重事駁斥不准已奉

諭旨明示事屬難行何敢復瀆惟嗣後京控奏案可否請  
旨敕下都察院步軍統領衙門仍照從前奏摺詞語兩持  
其平不遽就一面之詞先下斷語庶刁徒訟棍不能恃先  
發制人之勢再巡撫欽奉

特旨交審案件誠如厯次

聖諭卽與欽差無異必當親提審訊不應轉委惟親提之  
案究不能無委員幫審原告藉詞翻控輒稱仍行委員並  
不親提臣竊思欽差審案亦必有隨帶司員或督同研鞫  
或先令取供總不得謂非欽差親審似未可於巡撫獨有  
異言以臣愚昧之見熟籌辦法擬將通省京控各奏案在

今白華堂文集卷八

臣衙門暫設專局派臬司童槐總司局務除見任人員各有地方專責不令入局外以候補道府丞倅等作爲局員每案由臣親提至署督同局員審供勘辦庶案牘得以趕緊審斷漸就清釐不致隨辦隨積而臣督審之暇亦可分出工夫於地方一切緊要事宜較爲得辦臣爲挽回風氣整飭公事起見竇屬萬不得已用敢罄竭愚衷冒瀆聖聽是否有當謹繕密摺具奏伏祈

皇上睿鑒訓示施行謹奏

報撤審案局摺

代錢潤齋中丞

奏爲京控積案全數審結恭報撤局日期仰祈

聖鑒事竊臣於六月間陳請將京控積案暫在臣衙門設局辦理當蒙

特旨允准以臬司童槐總司局務臣卽與該臬司酌定於七月初六日開局審辦溯查京控各案自嘉慶五年首府衙門立有發審專局以來陳陳相因日積日夥距今二十餘年從無清釐之日近年雖經前撫臣和舜武奏定巡撫兩司分案提審每月各將審結若干起白行具奏立法不爲不備無如積弊太深革除非易除案情較輕循照奏定



章程應勒限各該府提審者業經發回外計省中新舊京  
控奏者等案開局時尙不下八十餘起其中有遷延八九  
年及五六年未能辦結者險健愈甚斷結愈難臣仰蒙  
大行皇帝聖訓諄詳無微不至謹率同臬司童槐心體力  
行欽遵疊奉

諭旨將審明實係虛誣之原告加重治罪始令其無可倚  
恃將把持之訟棍脫逃之原告當堂挺起不服審訊之案  
犯嚴加懲治始令其無敢逞刁將引誘勾串之奸胥蠹吏  
切實追究始令其無由牽制將官民兩持其平應參官吏  
俱隨案劾參始令其無從掩飾凡此辦法臣感蒙

聖訓旣一一得有遵循而臬司童槐亦仰遵

恩諭不敢稍懼讒言銳意辦理督同局員等曉夜在局恭  
逢

聖主御極之初整綱飭紀臣與該臬司等倍加奮勉一切  
京控奏案及原發府局難辦之咨案俱經提局審結其餘  
咨案在府局者臣與兩司趕緊分提審明亦各經按月具  
奏見在省中京控新舊各案皆埽數清釐毫無存積統計  
開釋無辜約二千餘人嗣後續有京控無論奏交咨交臣  
自可督同臬司隨時審辦其原發各府提審之咨案由臬  
司督催如有逾限立予參處亦可不再致積壓所有臣衙

門局務祇於奉

詔成服期內曾停止二十七日此外統計前後已屆兩月有餘茲定於本月十五日撤局並將嘉慶五年設立首府衙門之專局同時裁撤從此積習一祛訟風漸轉地方可次第整頓除將應辦各事宜另摺詳晰具陳外所有審結京控積案撤局緣由理合繕摺奏明伏祈

皇上聖鑒謹奏